



Adresa: **Ul. Hamdije Čemerlića 39 a**
71000 Sarajevo
<http://www.voda.ba>

tel. +387 33 726 400;
fax. +387 33 726 423;
e – mail: info@voda.ba.

21-01-2025

Broj: **30-693-14/24**
Datum: 20.01.2024. godine

Na osnovu člana 70. stav (4) i (6), člana 69. stav (3) Zakona o javnim nabavkama ("Službeni glasnik BiH", broj 39/14, 59/22, 50/24), donosim

O D L U K U
o poništenju Odluke o izboru najpovoljnijeg ponuđača broj 30-693-12/24 od 16.9.2024. i poništenju postupka „Sanacija i rekonstrukcija odbrambenog nasipa Velhovo-Grad Bihać“

Član 1.

Poništava se Odluka o izboru najpovoljnijeg ponuđača za javnu nabavku „**Sanacija i rekonstrukcija odbrambenog nasipa Velhovo-Grad Bihać**“ broj 30-693-12/24 od 16.09.2024. i postupak javne nabavke „Sanacija i rekonstrukcija odbrambenog nasipa Velhovo-Grad Bihać“ zbog dokazanih razloga koji su izvan kontrole ugovornog organa i koji se nisu mogli predvidjeti u vrijeme pokretanja postupka javne nabavke..

Član 2.

Za izvršenje ove Odluke zadužuje se Sektor za realizaciju projekata Agencije za vodno područje rijeke Save, Sarajevo.

Član 3.

Ova odluka će se objaviti na web-stranici www.voda.ba, istovremeno s upućivanjem odluke ponuđačima koji su učestvovali u postupku javne nabavke, shodno članu 70. Stav (6) Zakona o javnim nabavkama.

Član 4.

Ova Odluka stupa na snagu danom donošenja.

OBRAZLOŽENJE

Predmetni projekat je ušao u Plan i Finansijski plan Agencije za 2024. godinu na osnovu zahtjeva Grada Bihaća broj 04/2-21-3080/23 od 19.10.2023. godine, koji je kandidovan na propisanom obrascu/prijavi projekta, i gdje je u tački 2.5. obrasca navedeno da su imovinsko-pravni odnosi riješeni u cjelosti što je pored ostalog i bio razlog i osnov da se navedeni projekat uvrsti u Plan i Finansijski plan Agencije za 2024. godinu. Obrazloženje jza navedeno je bilo da je Odlukom o izgradnji, upravljanju i održavanju vodnih objekata na području općine Bihać (Službeni glasnik Općine Bihać br. 07/13) utvrđeno da su u vlasništvu Grada Bihaća uređena korita u urbanim područjima na površinskim vodama I kategorije, te da pravo upravljanja i održavanja navedenih objekata ima Grad Bihać.

Za predmetni projekat je provedena javna nabavka i dodjeljen ugovor najpovoljnijem ponuđaču na ukupan iznos od 498.835,55 KM, a koji nije potpisan od strane Gradonačelnika Bihaća. On je na sastanku održanom 19.12.2024. u prostorijama AVP Sava u Sarajevu izjavio da neće potpisati dostavljeni ugovor zbog neriješenih imovinsko-pravnih odnosa na lokaciji izvođenja radova, što nije u skladu sa izjavom datom u gore navedenom Zahtjevu Grada Bihaća koji je isto potpisan i ovjeren.

Napominjemo da su Stručne službe Grada Bihaća svo vrijeme prilikom izrade predmetnog projekta bile aktivno uključene u njegovu realizaciju. Tokom izrade održane su tri prezentacije, jedna u Sarajevu i dvije u Bihaću, uz prisustvo odgovornih osoba i zainteresovanih strana na realizaciji ovog projekta na kojima su prezentirani do tada urađeni dijelovi projekta i razmatrana problematika koja se može pojaviti prilikom izvođenja radova. Značajno je napomenuti da je projektant podloge dobio od predstavnika Grada Bihaća i da mu je skrenuta pažnja da je kriterija za izradu projektnog rješenja princip minimalne eksproprijacije, kako bi sam projekat bio održiv i moguć za izvođenje na terenu.

Na prvoj prezentaciji održanoj u Sarajevu dana 29.03.2023. godine je razmatrana dokumentacija Elaborat o inženjerskogeološkim i geotehničkim karakteristikama terena za potrebe sanacije i rekonstrukcije odbrambenog nasipa „Velhovo“ i Idejno rješenje sanacije i rekonstrukcije odbrambenog nasipa „Velhovo“, IPSA Institut d.o.o. Sarajevo. Na sastanku je zaključeno da se idejnim rješenjem predlaže potpuna rekonstrukcija na cijeloj dužini sa zamjenom podtla, da trasa projektovane rekonstrukcije prati trasu postojećeg nasipa, da na trasi ima izgrađenih objekata (vikendice, bazeni i sl.) koji su u koliziji sa postojećim i budućim nasipom, da će se rekonstrukcijom nasipa na nekim dionicama izaći iz granica parcele nasipa, da je neophodno na situacionom prikazu posebno naglasiti granice postojećeg i budućeg nasipa sa podacima o dodatnoj površini koju treba ekspropisati. Zapisnik sa ove prezentacije je u skladu sa tačkom 10.2. projektnog zadatka postao njegov sastavni dio i uputa projektantu kako da završi svoje tehničko rješenje.

Na drugoj prezentaciji i javnoj raspravi održanoj u Bihaću dana 13.06.2023. godine na kome su osim predstavnika Grada Bihaća, Agencije i Projektanta prisustvovali i predstavnici Gradskog vijeća Bihaća, Zavoda za prostorno uređenje Bihać i MZ Pokoj je razmatran je Glavni projekat Sanacija i rekonstrukcija odbrambenog nasipa „Velhovo“. Nakon prezentacije projekta, diskusije i pitanja prisutnih definisani su zaključci koji su bili uputa projektantu kako da okonča izradu projektno-tehničke dokumentacije. Ti zaključci su da ostaje potpuna rekonstrukcija postojećeg nasipa na cijeloj dužini sa zamjenom podtla, da trasa projektovane rekonstrukcije prati trasu postojećeg nasipa, da na postojećem nasipu ima izgrađenih objekata (vikendice, bazeni i sl.) koji su u koliziji sa postojećim i budućim nasipom i da je njihovo rješavanje obaveza Grada Bihaća, da će se na nekim dionicama izaći iz granica parcele nasipa, da je potrebno naglasiti granice postojećeg i budućeg nasipa sa podacima o dodatnoj površini koju treba ekspropisati, te da je za dionicu na kojoj nema nasipa jer je u nivou stogodišnjih voda potrebni predvidjeti „zečije“ nasipe (potrebno nadvišenje).

Kada je projektant sve tražene zaključke ugradio u svoje tehničko rješenje, dana 25.10.2023. godine održana je i treća prezentacija, opet u prostorijama Gradske vijećnice Bihać uz prisustvo predstavnika gradske uprave i zainteresirane javnosti, na kojoj je donesen zaključak da se Glavni projekat Sanacija i rekonstrukcija odbrambenog nasipa „Velhovo“ prihvata u cijelosti uz preporuku da naredna faza projekta bude izrada postrojenja prepumpne stanice za evakuaciju zaobalnih voda (ustave).

Nakon što je proveden postupak javne nabavke radova koji su se trebali izvesti na osnovu naprijed navedenog projekta Grad Bihać se povlači iz projekta, te je jasno, na osnovu naprijed navedenog, da se za ovaj postupak javne nabavke ne može zaključiti ugovor zbog dokazanih razloga koji su izvan kontrole ugovornog organa i koji se nisu mogli predvidjeti u vrijeme pokretanja postupka javne nabavke.

Na osnovu navedenog odlučeno je kao u dispozitivu.

PRAVNA POUKA:

Učesnik u postupku koji smatra da je ugovorni organ donošenjem ove Odluke prekršio jednu ili više odredbi Zakona o javnim nabavkama BiH ili podzakonskih akata može shodno članu 99. i članu 101. stav (1) tačka d) Zakona o javnim nabavkama BiH izjaviti žalbu ugovornom organu u roku od 10 (deset) dana od dana prijema ove odluke. Žalba se izjavljuje URŽ-u putem ugovornog organa u najmanje 3 primjerka. Žalilac je obavezan platiti naknadu za pokretanje žalbenog postupka (član 108. stav (1) Zakona o javnim nabavkama BiH).



v.d. DIREKTOR

Dženana Remić
Dženana Remić, dipl.iur.

Akt izradio: Kemal Okić *K. Okić*

Akt kontrolisao: Mirza Bezdob *Bezdob*

Dostaviti:

- Sektori 30 (50);
- Ponuđaču;
- a/a.